

SESSIONI URDINARIA DI U 4 DI LUDDU DI U 2022

N° 2022 /M3/17

**QUISTIONI URALI DIPUSITATA DA LERIA MARIA MUSSO, PÀ U GRUPPU
« AVVENE GHJUSTU È RESILIENTE », À U PRESIDENTE DI L'ESECUTIVU**

Ughjettu : Gestione pubblica di i scarti.

Sgiò presidente di l'Esecutivu,

A situazione in quantu à e rumenzule in Corsica hè pessima, pessima assai. A sapemu tutti.

Hè capita chì a gestione è a trasfurmazione di e rumenzule sò una sfida pà l'ambiente. A pruduzione di scarti hè in crescita in Corsica : 243 933 tunnilate pà u 2021, sigondu à u rapportu di l'Odem, publicatu u 21 du ghjugnu, vale à dì 721 chilò/abitante. 62% di sta massa hè sippilita, contru à solu 21% in cuntinente.

U costu di a raccolta è di i trasporti, ancu ellu, hè assai più impurtante in Corsica : 329€ pà una tunnilata, ciò chì raprisenta 135€/abitante, colpa, pà parte, à una debbulezza di u sistema di trascelta, è pà parte, à una gestione privata di i scarti.

Sta situazione vene da a delegazione di a cumpitenza di trattamentu di e rumenzule da a maiò parte di l'intercummunalità (EPCI) à u SYVADEC, chì invece d'assicurà a gestione pubblica di e rumenzule da par ellu, dà a so cumpitenza à sucietà private, pagate cù soldi pubblici. St'organizzazione pone parecchi prublemi, chì sò, oghje, prublemi publichi è cunnisciuti, è hè rispunsevule di a crescita di u costu di e rumenzule. A situazione ùn hè micca fosca, hè propiu chjara. Fintantu ch'elle saranu imprese private à esse in carica di a gestione è di i trasporti di i scarti, intaressi particolari pigliaranu a suprana nant' à l'intaressu cullittivu è u bè cumunu.

Fintantu ch'elle saranu imprese private à esse in carica di a gestione è di trasporti di i scarti, daremu un parmessu di nuce è un tarrenu d'attività ghjuvativu à gruppi maffiosi putenti.

U raportu di u presidente di l'Escutivu prisintatu in sessione u 28 è u 29 d'aprile, in complementu di u Prughjettu di u Pianu Tarritoriale di Privinzione è di Gestione di i Scarti ramenta a necessità è a vulintà di l'Assemblea di Corsica d'impone una gestione pubblica di e rumenzule. Eppure, stu modu di gestione ùn hè micca messu in valore ind'u Prughjettu di Pianu, chì hè u documentu ufficiale è vutatu.

S'ella hè mintuvata a gestione pubblica, ùn sò spiegate, in minuzia, nè u so funziunamentu, nè cum'ella hà da esse urganizata è da quale. Invece, si tratta di a pussibilità di mette in ballu cuntratti trà u privatu è u publicu, senza pricisà parchè, trà quale, è di chì tippu sarianu sti cuntratti. Ùn si capisce micca, quì, cumu si po assicurà chì l'imprese rispittissinu u pianu di a Cullettività di Corsica, nè mancu in chì situazione si pò sparte a cumpitenza di raccolta, gestione è trattamentu, o micca. Andemu versu una forma nova di gestione privata, prutetta da un cuntrattu cù i puteri pubblici, senza cuntrollu da nimu.

Da compie, u Pianu Tarritoriale di Privinzione è di Gestione di i Scarti ùn hà micca dimensione ubligata. Vale à dì ch'ùn ci hè nisuna garanzia chì e misure prisintate, anu da esse rispittate.

Sti punti critichi, chì ci parenu di primura, sò tutti stati prisintati inde l'avisu di a cummissione 1 di l'Assemblea di a Juventù.

Cunsiderendu chì a prisintazione di u raportu è u dibattitu in sessione di l'Assemblea di Corsica u 29 d'aprile ùn danu micca elementi di risposta precisi è cuncreti, sgiò presidente, u nostru gruppu hà una dumanda sola: **cumu s'hà da fà a gestione pubblica di e rumenzule ?**